

佛說較量一切佛刹功德經

宋西天譯經三藏朝散大夫試光祿卿明教大師法賢奉詔譯

如是我聞一時佛在王舍城法野菩提道場
坐金剛摩尼寶師子之座有菩薩摩訶薩眾
周匝圍遶復有十佛刹百千俱胝那由他眾
聽佛說法爾時會中有一菩薩摩訶薩名不
思議光王即從座起瞻視大會諸菩薩已而
白眾言汝諸佛子今當諦聽此娑婆世界滿
一大劫較量時分是彼西方極樂世界無量
壽佛刹一晝夜佛子彼極樂世界一大劫較
量時分是阿你弭沙世界疇日囉_{合二}娑誡羅
鉢囉摩哩那曩如來佛刹一晝夜佛子彼阿
你弭沙世界一大劫較量時分是不退輪光
明世界敷蓮華身如來佛刹中一晝夜佛子
彼不退輪光明世界一大劫較量時分是無

塵世界法王如來佛刹中一晝夜佛子彼無
塵世界一大劫較量時分是燈光世界師子
如來佛刹中一晝夜佛子彼燈光世界一大
劫較量時分是善光世界毗盧遮那如來佛
刹中一晝夜佛子彼善光世界一大劫較量
時分是難勝世界法敷身如來佛刹中一晝
夜佛子彼難勝世界一大劫較量時分是謨
賀世界一切通意王如來佛刹中一晝夜佛
子彼謨賀世界一大劫較量時分是現圓光
世界讚歎如來佛刹中一晝夜佛子如是一
切世界依劫算數過十佛刹百千俱胝那由
他微塵數劫已有世界名蓮華吉祥彼佛世
尊名賢吉祥是彼佛刹中一晝夜佛子彼有
菩薩地名普行行地如是無量菩薩行佛子
若復有人於此較量一切佛刹功德經受持

讀誦爲他解說彼人命終十方佛刹恒河沙
數諸佛如來悉皆現前滿彼有情一切所願
佛說此經已不思議光王菩薩及諸大衆聞
佛所說皆大歡喜信受奉行
佛說較量一切佛刹功德經